

Jang Lupa Katong Pung Panggilan!

Di Tulis oleh Michael Willy Patawala

Para pelayan seng boleh lupa dong pung panggilan. Tuhan pangel dan pilih para pelayan voor melayani antua pung umat, bangsa Maluku di Negeri Belanda. Diskusi tentang panggilan seorang pelayan di pimpin oleh Pdt Verry Patty. Para pendeta GIM percaya kalau Panggilan yang biking kuat dong dalam dong pung pelayanan di jemaat Geredja Indjili Maluku (GIM). Tantangan dan pergumulan dalam pelayanan itu biasa. Para pelayan di GIM kuat dalam pergumulan pelayanan kalau dong inga dan pegang dong pung panggilan. Tagal itu pelayan GIM musti tau dong pung panggilan. Para Pelayan GIM musti tau mengapa dong jadi pelayan di GIM.

Beta bersyukur karena Convent Pendeta GIM di Wuppertal kasi inga dan kasi kuat beta pung panggilan untuk melayani GIM di tanah Belanda. Beta masih muda balong punya banjak pengalaman melayani djemaat. Tagal itu beta musti balajar banjak dari pendeta pendeta senior GIM. Tiga hari di Wuppertal beta dengar dan belajar banjak dari pengalaman pendeta senior yang carita dong pung panggilan dan pergumulan pelayanan di GIM. Dong sudah melayani GIM puluh puluh taong. Banjak pergumulan yang dong dapa tapi dong seng pernah mundur. Dong tetap toma madju karena dong percaya Tuhan yang pangel dong Tuhan juga yang kasi dong kekuatan untuk cari jalan keluar voor pergumulan pergumulan yang dong hadapi dalam pelayanan.

Beta bersama calon pendeta baru katong rasa kalau pendeta pendeta senior GIM tarima katong. Dong bantu katong dan dong anggap katong kaya dong pung saudara dan anak. Dong bage dong pung pengalaman pelayanan voor katong calon pendeta baru. Pendeta pendeta senior pung pengalaman biking kuat katong calon pendeta baru untuk mulai katong pung pelayanan di djemaat djemaat yang akan katong layani.

Di Convent Pendeta, para pendeta juga dapat kesempatan voor sama sama batjarita tentang sejarah dan identitas dari Geredja Indjili Maluku. Katong seng boleh lupa sejarah dari GIM. Aer mata dan doa dari generasi pertama yang su kasi badiri GIM seng boleh katong lupa. Katong musti sama sama toma madju kasi tarus perjuangannya generasi pertama Maluku, supaya api indjil tarus manjala di GIM.

Ketua Sinode, Pdt. Matulesy juga kasi ingat katong supaya katong kaca diri. Ketua sinode ajak katong supaya katong bisa lia katong pung diri apakah katong sudah sungguh sungguh dalam melayani katong pung domba domba yaitu djemaat djemaat GIM. Dalam diskusi para pendeta juga balajar untuk siap di utus ke mana saja. Jemaat basar atau kacil samua sama. Dong samua adalah domba domba yang Tuhan sayang. Katong sebagai gembala gembala yang Tuhan utus musti siap layani dong.

Seng Cuma carita pengalaman pelayanan, katong juga makan makanan yang sadap sadap. Katong tidur di penginapan yang enak. Dan yang paling penting para pendeta dan bestuur Sinode bisa dudu sama-sama, dan batjarita, laeng bisa labe kanal deng laeng labe dekat.

Danke banjak untuk Sinode GIM yang sudah urus katong selama tiga hari di Wuppertal. Danke Banjak juga untuk Pdt Alex Nikijulw, ketua Convent Pendeta GIM tahun 2022 yang sudah ator acara Convent Pendeta GIM 2022 sampe akang samua bajalang bagus. Danke banjak juga untuk djemat djemaat GIM di Belanda yang setia dukung dan berdoa untuk pelayanan para pendeta GIM.

Katong bersyukur voor Tuhan Yesus karena antua pung sayang dan berkat GIM tetap ada sampe sakarang ini, dan sudah 70 tahun melayani bangsa Maluku di Tanah Belanda. Katong samua sama sama berdoa dan sama sama pegang tangan toma madju supaya GIM tarus ada untuk melayani bangsa Maluku di negeri Belanda.

Tuhan Yesus berkati katong samua.